



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim tir_yimyim

tir yimyim TAPAK 8

Rajendra Vishwanath Arlekar-i Kerala Angh tenangzükba agiogo

Auckland Classic: Naomi Osaka semi-final tongogo



VOL. XXII ISSUE NO. 80 (ADOK 80) DIMAPUR KÜPTOKNÜ (SATURDAY) AENJETI (JANUARY) 04, 2025 ₹ 5.00

Aolemba-i NSCN (Khango) onük jangjashitsür

Dimapur, January 3, 2025 (TYO): NSCN (Khango)-i Aolemba Longkumer dak tai tongloksüba aser Rs. 50 lakh meshiba kuli agüja December 29, 2024 nü sangdong ka prokshiba atema Aolemba-i jangjashitsüogo.

MSE-Cluster Development Programme kübok Ministry of Micro, Small and Medium Enterprises (MSME), Government of India-i Dimapur nung Wooden Furniture Cluster atema Common Facility Centre (CFC) ka amenoktsü mulunga agizükogo aser ministry telatetba ama Directorate of Industries and Commerce, Govt. of Nagaland-i nodal agency aser Nagaland Industrial

Development Corporation (NIDC) Ltd., Dimapur-i implementing agency ama inyaker, ta Aolemba-i sangdong ka nung ashi.

Iba scheme nung Country Craft Development Society-i Special Purpose Vehicle (SPV) ama shilem agir. Iba society nung chairman ka ama pa contractor mesüra supplier masü saka co-promoter/beneficiary ka lir ta Aolemba-isa jangjashitsüogo.

"Iba CFC mapatong ya tang teinyakdak lir aser iba dak sendakba osang tejangja nodal agency aser implementing agency ket nung lior. Anungji kü dak tiyazü tai tongloksüba atema meratatsü mepishir" ta paisa ashi.

NCS ketdangsür 5 IAS nung aniokogo

Dimapur, January 3, 2025 (TYO): Centre sorkari Nagaland Civil Service (NCS) ketdangsür pungu tashi Indian Administrative Service (IAS) nung aniokogo.

Ministry of Personnel, Public Grievances and Pensions (Department of Personnel & Training)-i Hokolbarnü

sangdong ka agütsüba nung Select List of 2023 ajanga parnok aniokba metetdaksüogo.

IAS jenjang nung ajungketba NCS ketdangsürtem ya Zarenhung Ezung, Zhothisa Dawhuo, Limawabang Jamir, Angelina Tajen aser Akunü Meyase nung lir.

Kangpokpi nung SP office amak

Imphal, January 3, 2025 (Agencies): Hokolbarnü Kangpokpi district nung tensa mejungi küma lir. Central forces-i Kuki bunkers aser "Kuki red zones" atsünga agiba anema Kuki nung telok kati SP office amak.

"Kuki red zones" ya Kuki telungpurtem amenba tesemtem lir aser iba nungi lendenlen Meitei yimtsüngtem amaker ta tai tongloksür.

Hokolbarnü nisung telok kati SP office amakdang police garitem raksatsü aser police dak teka sangshia liasü. Iba lendong nung Kangpokpi SP Manoj Prabakar, IAS dena yiru aser pa mozü ki ka nung anepaludar.

Nisung telok senhidaktsü atema police-i tear gas aser mock bombs amshi saka telungpurtemi police station nung injang khaloktsüba manener ta iba osang zülü tashi nung tensaji lir.

SP Manoj-i Committee on Tribal Unity (CoTU) lennirtem dang Valley nungi arua Saibol nung anenzüka aliba central security forces ghonda asem tsüngda Kangpokpi Police aser Kangpokpi-based central units ajanga melenzüktsü ta nangzükba sülen ashishitep ken o adok.

ghonda aika süiaka mapa kecha meinyakba ajanga nisungtem tejashi nung taonung 7:00 ako meta SP office tsütsü aodang mepetmesü adoka raratep.

Anogo asem tejakdang Kangpokpi district kübok Saibol tesem nung mepetmesü adoka liasü. Kuki tsürtemi iba tesem nung security forces lemzüktsüba atema lungkak aitdang tensa mejungi aküm.

Iba anogo Kuki tsürtemi Border Security Force (BSF), Indian Army aser Central Reserve Police Force (CRPF) külemi mapa inyakba noktanga liasü.

December 29 nü Army, CRPF, aser BSF külemi telungpurtem meindokba aser bunkers raksatsüba sülen Kuki tsürtemi lungkak ait.

Chief Minister N Biren Singh-i Manipur nung dang May 2023 nungi tensa mejungi aruba atema tatok meshiba aser nisung ajak dang tai tokteptsü aser amadoktsü mepishiba sülen Kangpokpi district nung tensa mejungi kümogo.

Manipur nung May 3, 2023 nungi Meitei aser Kuki nung tsüngda mepetmesü adoker rarayonga arudang nisung 200 tema taküm samaogo aser meyrjang aika pei talidak toktsür jena ogo.

Dimapur nung anogo 3 atongtepa kitsükkirong lendong atalok



Dimapur, January 3, 2025 (TYO): 2025 küm tasen nung ayaokba sülen Dimapur nung anogo asem atongtepa kitsükkirong lendong tulu asem atalokogo.

January 1 nü K Kire colony, Kuda village nung aser January 2 nü Naharbari Ward-8 nung kitsükkirong lendong atalokba sülen tanü Lomithi Colony-B, Ward-15 nunga ki 12 rondokogo.

Hokolbar anüngdang 12:48 ako meta kitsükkirong lendong osang angashiba sülen fire

tenders ana den fire personnel iba tesemi yok ta West Fire Station, Dimapur nung ketdangsür kati ashi.

Iba sülen Central Fire Station nungia fire tenders ana arua ghonda ka shi nung mi enseptet ta ketdangsürisa ashi.

Iba mi lendong ya ki ka joka nungi adokba asütsü akok ta ali kiburi ashi.

Brihostibarnü Naharbari Ward-8 nunga kitsükkirong lendong ka nung ki 100 shi rondok aser iba ajanga kibong 200 tema talidak maka kümogo.

Yashinep 11:29 ako meta mi lendong osang angashiba sülen fire tenders 5 den firefighters yok ta Central Fire Station Dimapur nung ketdangsür kati ashi.

Iba sülen West Fire Station aser Chümoukedima Fire Station nungi fire tenders pezü arusema minute 90 shi nung ang miji enseptet ta ketdangsürisa ashi.

January 1 anepdang 10:30 ako meta Kuda village kübok K Kire colony nunga ki pezü tashi rondok.

Tanurtemi social media account lapokba alenbanger

New Delhi, January 3, 2025 (Agencies): Centre sorkari Hokolbarnü Digital Personal Data Protection rules indang draft sayaogo aser iba nung arishi küm 18 ser teküpokpuri social media accounts lapoktsü atema tsürabur temelaba nungdaksü ta lateta lir.

"Tanur ka indang personal data magizükdang tamasa tsürabur

dang nungi temelaba nungdaksü" ta DPDP rules nung shia lir.

"Digital Personal Data Protection Act, 2023 (22 of 2023) nung tashi agüja aliba nung ajemdaker centre sorkari draft yanglur" ta DPDP rules nung shia lir.

February 18 sülen item draft rules ta tatembang süa agizüktsü atema abentsü.

Data collecting entity-i tanur tsüraburji tain asü masü jangjatsüla ta draft rules nungsa shia lir.

Iba data fiduciary kübok e-commerce, social media aser gaming platforms ajak adentsü.

DPDP Act nungsa personal data timi mebenshiba data fiduciaries dang Rs. 250 crore tashi senchi achitsü lateta lir.

India nung Human Metapneumovirus puteta mali

New Delhi, January 3, 2025 (Agencies): China nung Human Metapneumovirus (HMPV) prokshiba atema petsaprong maoksatsüla ta Directorate General of Health Services (DGHS) Director General Dr Atul Goel-i metetdaksüogo.

China nung virus ka prokshir ta osang sangdongba sülen Dr Goel-i iba ya ashi.

"China nung Human Metapneumovirus prokshiba osang lir. Metapneumovirus ya tanga respiratory virus den kasa dang lir" ta pai ashi.

Taoba hopta Reuters-i virus prokshiba osang metetdakja liasü saka China-ibo ibaji masü ta ashir.

HMPV ya tanga respiratory virus den kasa dang lir aser iba ajanga yimra adokdaksür. Iba virus ajanga tanur aser taintemi dak yimra agi atonger ta Dr. Goel-i ashi.



"Na aketer mesüra yimra agi tonger lira, ibaji memenadaksütsü atema tangar den kanga anasatepa tekazü. Yimra mozü achiba ai perir anungji kangabo maoksateptsüla" ta pai ashi.

"Tang tashi nung China nung respiratory outbreaks kanga aika akümiba data kecha mali. Yimya agi asükwa mapang respiratory infections kanga adoker aser iba atema mozü kitem renema lir" ta Dr. Goel-isa metetdaksü.

Union Health Ministry kübok

National Centre for Disease Control (NCDC)-ia respiratory aser seasonal influenza shirangtem dak tenük yokdar aser international agencies den osang metetepeladar.

China nung respiratory disease tasen ka adokber prokshir ta asüba agi alima ajungalen COVID mesükba tensa ka ajurutsü akok ta nisungtemi tsübuteper.

COVID-19 ya December 2020 nung mezünga China kübok Wuhan yimti nung adok aser iba tashidak ajanga nisung million aika taküm samatsüogo.

World Health Organisation (WHO)-ia taoba Hombarnü China dang osang talila lemsateptsü indang sangdong ka agütsüogo.

Iba atema China-io parnok "global origin tracing research" nung shilem tulutiba agiogo ta telangzüba agüja liasü.

Linük tesem 12 nung NIELIT Deemed to be University semzük

Guwahati, Aenjeti/January 03 (Agencies): Assam Governor Sri Lakshman Prasad Acharya, Union Minister of Railways, Information & Broadcasting and Electronics & Information Technology Ashwini Vaishnav aser Assam Chief Minister Dr. Himanta Biswa Sarma nungertem lungjemer January 3, 2025 nü North Eastern States nung tesem pongu densema linük nung tesem 12 nung National Institute of Electronics & Information Technology (NIELIT) Deemed to be University semzüksüog.

NIELIT Deemed to be University ya Ministry of Electronics & Information Technology (MeitY) kübok university ka ya dang lir aser ibai Guwahati nung sentong ka agidang linük nem bendanga agütsü.

Kasa mapang India nung semiconductor skilling ecosystem tajungba kumdaktsütsü mechi NIELIT aser Tata Electronics Private Limited (TEPL) tsungta Memorandum of Understanding

(MoU) ka zülutepa liasü. Iba MoU nung Dr. M. M. Tripathi, Director General, NIELIT aser Dr. Randhir Thakur, CEO & MD, Tata Electronics Private Limited (TEPL) nati meyongnem agütsü. NIELIT aser TEPL lungjemer Semiconductor ATMP (Assembly, Testing, Marking, and Packaging) technologies nung skill centers amenoka, diploma aser certification programs tem yangea workshiopts agütsü nükjidong nung iba MoU ya zülutep.

TEPL yagi technical expertise aser internship maongka agütsütsü aser NIELIT yagi education, training aser outreach nung rangloksü aser lokti tentet anaprong ya lungjemer research aser funding maparen inyaktsü aser talisa Northeastern region nung maongka agütsütsü asoshi tali inyaktsü.

Iba sentong nung Union Minister Ashwini Vaishnav-i jembidang India ya Semiconductor Manufacturing, Artificial Intelligence, Cyber



Assam Governor Sri Lakshman Prasad Acharya, Union Minister of Railways, Information & Broadcasting and Electronics & Information Technology Ashwini Vaishnav aser Assam Chief Minister Dr. Himanta Biswa Sarma nungertem lungjemer January 3, 2025 nü North Eastern States nung tesem pongu densema linük nung tesem 12 nung National Institute of Electronics & Information Technology (NIELIT) Deemed to be University semzüksüodang tangokba noksa nung angur.

Security, aser Industry 4.0 atema tesep ka kumdaktsütsü sorkari bendanga agütsür inyakba indang rasaa ashi.

Ato kilonser mangdang den lirumedema iba sentong yagi industry nung nungdakba nübu peria skills agütsüba nung yaritsü, ta ashi. Iba sentong ya temeshi Kamakhya Devi yimti nung agia liasü.

Paisa NIELIT indang campus tasenba ya Guwahati anasa Jagiroad nung yanglutsü aser yangji semiconductor manufacturing aser electronics manufacturing nung rangloksü.

(Maneni tapak 8 nung...)

66 buba LKTM Sports & Literary sentong agiogo

Dimapur, Aenjeti/January 03 (TYO): Longjang Kaketshir Telungiem Mungdang indang 66 buba Sports and Literary sentong December 27-30, 2024 anogotem Longjang local ground nung agia liasü, kong Advisor, Law & Justice and Land Revenue, Govt. of Nagaland, TN Mannen IAS (Retd.) alakteta jaoker ama dena liasü.

Iba sentong nung jembidang, yimtsüng nung shisalok tajungba kumdaktsütsü asoshi Longjang yimdak lokti tentet balala, talisa

arogo, kaketshir aser putu mendeni temulung agütsüba atema Advisor Mannen-i tenüngsang agütsü.

Pai kaketshirtem dang pei sempet ya tekolok aser temang shi nung tajungdang renemshia yangertsü ajungshi aser tajung nung tokteptsü ayongzük. Pai kaketshirtem dang iba anogo pezü sentong nung temulung agüja shilem agütsü ayongzük, aji mesüra rongsen aser mapang indokba dang asütsü ta ashi.

Iba sentong tenzuka LBA

pastor Senti Longchar-i sarasadem, Longjang Students' Union tir Moarenba Longkumer-i pela agizükba o jembi aser Imtinungsang Longchar, Longjang Village Council ajanga tajungshi o jembia liasü.

Sobaliba aser kenshi oshi tetoktepba nung yimya balala nung toktepa liasü aser Longjang Students' Union Mokochung ajanga Overall Champions sempet angu aser Longjang Students' Union Dimapur-i tanabuba jenjang angu.

Lirmen yimdak 78 buba JKM mungdang alitsü

Dimapur, Aenjeti/January 03 (TYO): 78 buba Japukong Kaketshir Mungdang (JKM) inti mungdang alitsü atema Lirmen yimdak renemshiba mapang lir, koba January 8-10, 2025 anogotem agütsü lir.

Iba mungdang ya "Ajungjen Lima Tasen" (A Whole New World) omen aser "Terenlok aser Tejakleni" (Progress and Advancement) onük nung ajemdaker alitsü, koba Minister,

Housing and Mechanical Engineering, GoN, Bashangmongba Chang ajanga semzüksütsü.

Mezüng sentong nung Lirmen Baptist Arogo nung pastor, Rev A Mar Pongen-i mungdang tenzuka sarasademtsü, JKM tongti zülur Temjenliba Aier-i osangtsüsang agitepba mapang alitsü, Lirmen Village Council chairman, B Kumzuk Longchar-i tayongzükba o jembitsü, Nokpu Kaketshir

Telungiem ajanga temeja ken ka atentsü.

Kasa sentong nung Minister, Higher Education and Tourism, Temjen Imna Along Longkumeria o jembitsü, shiba 78 buba Japukong Kaketshir Mungdang indang chief host asütsü.

Japukong Senso Senden tir Imdong Jamir-i tajungshi o jembitsü aser Children Choir ajanga "Kü Meim Japukong" ken atentsü.



January 03, 2025 anepdang züngia Settsü yimdak ki ka meshi-meshia rongdokogo. Iba kitsük-kirong lendong nung nisung asü-amaba mesüra yiruba osang mali saka kiset shirurubo kar rongset. Iba mi lendong ajanga sen lakh 20 shi jenjang takoksa nguogo. Fire & Emergency services, Mokochung nungi sepaitem arua mi ensepba ajanga anasa aliba kitembo marong.

DEBTS RECOVERY TRIBUNAL GUWAHATI
Suwarna Bhawan, House No. 12, New Town Path, Near Hanuman Mandir, G. S. Road, Ulubari, Guwahati-781007 (Assam)

SALE NOTICE
DRPC NO. 161/2023 ARISING OUT OF O.A. No. 345 OF 2019
IN THE MATTER OF
CANARA BANK
VS
M/S. MARBLE AND GRANITE HOUSE AND OTHERS

Tsünglanglen shia aliba ali kimong ya online e-auction ajanga <http://drt.auctiontiger.net> nung shia aliba anogo, mapang aser tesem nung tekalen senapur sentü menoktsü atema tsünglanglen agüja aliba terms & condition nung "as it is where it is" yimya nung agüja aliba case number nung aliba sen menoktsü atema ayoktsü:

- Iba kimong ya sen 1,35,00,000.00 (Rupees One Crore Thirty Five Lakh only) dang tajemba agi mayoktsü.
- Tsünglanglen shia aliba ali kimong ya e-auction ajanga onoki **March 4, 2025 nikonkdang 3:00 ako nungi nikonkdang 4:00 ako** tsungta auto time minute pongu atsülanga, e-auction service provider M/s. E-Procurement Technologies Pvt. Ltd indang e-auction platform <http://drt.auctiontiger.net> nung "As is where it is", "As is what it is", aser "Whatever there is" yimya nung aser State nung alima ozung nung ama ayoktsü. Bidders temi Contact Nos: 9265562818/9265562821/6352634834 of M/s. E-Procurement Technologies Pvt. Ltd. (Auctiontiger), Head Office: B-7705, Wall Street II, Opp. Orient Club, Near Gujarat College, Ellis Bridge, Ahmedabad- 380006, Gujarat (India), E-Mail: support@auctiontiger.net & ramprasad@auctiontiger.net nung tongteprateptsü.
- Alitsü bilema alirtemi earnest money sen 13,50,000.00 (Rupees Thirteen Lakh Fifty Thousand only) Demand Draft/Pay Order/NEFT/RTGS yimya nung "Recovery Officer, DRT Guwahati, A/C No. 0568050012591", IFSC Code: PUNB0056820, in Punjab National Bank (Erstwhile United Bank of India), Silpukhuri Branch, Guwahati, Assam nung **February 28, 2025 nikonkdang 4:00 ako** tashinung deposit sütsütsü.
- Takok anguba bidder asoshi iba sen den tanüngba sen agütsü aser aji mesüra ali ayokba maparen temer asemnü tsungta e-payment ajanga meyiptsütsü.
- Takok anguba bid der-i sale proceeds shilem 25 ya tekeratiba nung Demand Draft/ Pay Order / NEFT / RTGS yimya nung "Recovery Officer, DRT Guwahati, A/C No. 0568050012591", IFSC Code: PUNB0056820, in Punjab National Bank (Erstwhile United Bank of India), Silpukhuri Branch, Guwahati, Assam nem DEMAND DRAFT/ EFT/ NEFT/RTGS ajanga "Recovery Officer, DRT Guwahati, A/C No. 0568050012591" nem inoktsütsü aser iba deposit mesüterera iba ali kimong ya ano tanaben ayoktsü.
- Taliri tanüngba sale proceeds shilem 75 ya auction sale nungi anogo 15 tsungta deposit sütsütsü.
- Tekalen shia aliba den külemi taliri total sale consideration money (plus Rs.20) nung poundage fee @1%, DD ajanga Registrar, DRT Guwahati nem inoktsütsü.
- Recovery Officer, DRT, Guwahati ajanga melaba ama tematiba bid agizüksü.
- Iba auction ya jelia osang agütsütsü mashi mapang thinentü akok.

Submission of bid: Annexure I & II nung agüja aliba yimya nung bids ya Office of Debts Recovery Tribunal, Guwahati nung **Recovery Officer II** nem **February 28, 2025 nikonkdang 4:30 ako** tashinung EMD kuli dener agütsütsü. Ano bidders temi shia aliba Recovery Officer nem pa indang official e-mail ID deepak.kmishra@gov.in nung shia aliba anogo aser mapang tsungta meyongnem shidak agüja aliba filled up bid form aser declaration den EDM agütsütsü akok. Iba anogo aser mapang sülen bid magizüksü. EDM indang danga tejangja aser terms and conditions ya <https://drt.auctiontiger.net> nung angütsü.

ALIKIMONG TERASA
Thilixu Village, 3rd Mile, Dimapur, Nagaland nung land allotment order SL. No. 90 dated 25.05.2012 nung shia aliba ama ali tasazük 200 ft x 180 ft = 36000 sq. feet aser arütsü:-
North: Approach Road, **South:** Fishery, **East:** Paddy Field, **West:** Hokhehi, W/o Late Xutoi, OA indang schedule B nung shia aliba ama.
Reserved Price: **Rs. 1,35,00,000.00** Earnest Money Deposit: **Rs. 13,50,000.00**
Date of Auction: **04th March 2025** Time of Auction: **03.00 PM**
Bid Increment: **Rs. 1,00,000.00** or in multiple thereof.
Iba dak tal tejangja metethertemiba undersigned mesüra Canara Bank, Dimapur Branch den tongteprateptsü akok.
Given under my hand and seal on this 18th day of December 2024 at Guwahati.
(Deepak Kumar Mishra)
Recovery Officer II
Debts Recovery Tribunal, Guwahati- 7

GOVERNMENT OF NAGALAND
DIRECTORARE OF PRISONS
NAGALAND: KOHIMA.

NO.PRI/HQ/Ration-32/12 (Pt.II) Dated Kohima, the th Dec' 2024

TENDER NOTICE

Sealed tenders are hereby invited for supply of Ration and Allied articles of various itemsto Jails in Nagaland during 2025-2026. The last date for submission of the tender formsis 23.01.2025. The tender documents will be opened on the same day at 1.00 pm at Prison Head Quarter.

Tender forms may be collected from the Office of the Prison Head Quarter from 09.01.2025 during Office hours on payment of Rs. 1000/-

Sd/-
(RENCHAMO P. KIKON) IPS
Director General of Prison
Nagaland, Kohima

Rajendra Vishwanath Arlekar-i Kerala Angh tenangzükba agiogo



Thiruvananthapuram, January 03 (Agencies): Rajendra Vishwanath Arlekar-i Kerala yimtiba, Thiruvananthapuram nung aliba Raj Bhavan nung Kerala Angh inyaktüsü atema tenangzükba agiogo; Kerala High Court nung Chief Justice, Nitin Jamdar-i ketdangsüa pa nem tenangzükba agidaktüsü.

Pai Arif Mohammed Khan melenzüker. Khan Bihar nung

Angh inyaktüsü. Tenangzükba agiba sentong nungji state Chief Minister Pinarayi Vijayan, Chief Secretary Sharada Muraleedharan, Chief Justice Jamdar aser Additional Chief Secretary for General Administration, K R Jyothilal nungeri pa agizüka liasü.

Kasa sentong nung West Bengal Angh C V Ananda Bose, Assembly Speaker A N

Shamseer, Minister tem- K N Balagopal, P Rajeeve, Roshi Augustine, K Krishnankutty, Kadannappally Ramachandran, V Sivankutty, G R Anil, Muhammad Riyas, Opposition lenir V D Satheesan, aser Congress MP, Shashi Tharoor nungera liasü.

Taoba hopta India Tir, Droupadi Murmu-i Khan Bihar Angh shim aser Arlekar Kerala Angh shima liasü.

HMPV wara atema kecha taoksatsü mali: Health Ministry

New Delhi, Aenjeti/January

03 (Agencies): Hokolbarnü Health Ministry-i, tang China nung Human Metapneumovirus (HMPV) wara poktetbaji sorkari mita dang repringdar aser iba wara atema kecha taoksatsü mali, ta metetdaktüsü.

Hokolbarnü Director General of health services (DGHS), Atul Goel-i, "China nung Human Metapneumovirus (HMPV) wara poktetba atema kanga bulua jembidar. Ajsüsüaka onoki linük (India) nung tangu sashiba dak sendakba timtem indang data asadangogo 2024 küm December ita data nung teimba akümba osang mali. Tang tensa atema taoksatsü kecha mali," ta metetdaktüsü.

"Talisa asükwa mongpu nung tangu sashiba dak sendakba timtem wara kanga bulua akümer; ibayongji hospital tem nung nüngdakba supplies aser yipten renemer," ta pai

ashi. Paise nüburttem dang tangu sashiba dak sendakba wara prokba nokdangtsü atema ajaki kümdangtsüla, talisa yimra agi tonga alirtem aser aketeritemi tangar anasa maotsü tekümdangtsü metetdaktüsü.

Ano külen China-ibo, taküm tangu sashiba dak sendakba timtem ya yaküm dang nungi mesashiba lir, ta metetdaktüsü.

China foreign ministry otongdar, Mao Ning-i, "Asükwa mongpu nung northern hemisphere nung tangu sashiba dak sendakba timtem wara kanga bulur, ajsüsüaka iba ya yaküm dang nungi mesashiba lir," ta metetdaktüsü.

"China sorkari sensotem aser China nung bendangertem temang anema alitsü atema nendaka inyaker. China-i arutsü kecha shisabulutsü mali," ta paisa metetdaktüsü.

Office of the Managing Board Baptist Hr. Sec.School, Mangkolemba

Situation Vacant

- History , (PGT) 1 post
- GT, (PCM/PCB) 1 post
- UGT 1 post

For serial no. 1 & 2 B.Ed. will be preferred and serial no.3 with D.El.Ed.

Sent resume through email- bhss_mba@yahoo.co.in
WhatsApp - 7005946609 / 9366291226

Last date : 15th January, 2025.

बैंक ऑफ बरौदा
Bank of Baroda

KOHIMA BRANCH
Main Bazar Road, Near Old Taxi Stand, Kohima- 797001
Email: Kohima@bankofbaroda.co.in

Kiojen ayoktsü atema Sale Notice
APPENDIX- IV-A [See proviso to Rule 6 (2) & 8 (6)]

Securitisation and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 kübok Rule 6 (2) & 8 (6) nung ajemdaker kiojen ayoktsü atema E-Auction Sale Notice agütsür.

Public aser talisa sen apur (tem), Mortgagor (tem) aser Guarantor (tem) dang, tsünglanglen metetdaksa aliba aser Secured Creditor dang mortgaged/charged süa aliba kiojen Authorised Officer of Bank of Baroda, Secured Creditor-i agiadokogo ta sangdonger, aser ibaji tsünglanglen shia aliba account/s nung sentsüh alangzüksü atema "Kong aliar yamaji", "Koma lidir yamaji", aser "Yangji aliba ajak" nung ayoktsü. Sen apur/tem/Mortgagor/Guarantor/tem/Secured Asset/s/Dues/Reserve Price/e-Auction Anogo aser Mapang, EMD aser Bid Increase Amount tsünglanglen metetdaktüsü -

Sr/ Lot No.	Name & address of Borrower/s / Guarantor/ Mortgagors	Short description of the immovable property with known encumbrances, if any	Total Dues	Date of E-Auction, Time of E-Auction, Start Time to End Time	1. Reserve Price 2. Earnest Money Deposit (EMD) 3. Bid Increase Amount	Status of Possession (Constructive/ Physical)	Property Inspection Date & Time
1.	Mr. Hyungwalo Jeshing Rengma, R/o- H. No. E/A-1/01, Agri Colony, Opp. Stella Higher Secondary School, Kohima, 797001, Mr. Kewetso Mero (Guarantor) New Minister Hill, Kohima- 797001.	Land and building measuring 1500 Sq.ft covered by Patta No. 8364 (New), Plot No. 5531 situated at Agri Colony, Kohima, District Kohima, Nagaland standing in the name of Mr. Hyungwalo Jeshing Rengma. Bounded : On the North by: Property of Seyiekhoh Angami, On the South by: Property of Hyungwalo Jeshing, On the East by: Nullah, On the West by: Property of Seyiekhoh Angami.	Rs. 1,98,87,471.60/- (Rupees One Crore Ninety Eight Lakhs Eighty Seven Thousand Four Hundred Seventy One and Sixty Paise) and interest and other charges thereon w.e.f 30.07.2022.	Date: 06.02.2025, Start Time: 01.00 pm End Time: 03.00 pm	1. Reserve Price: Rs. 2,30,85,000.00 2. Earnest Money Deposit: Rs. 23,08,500.00 3. Bid Increase Amount: Rs. 50,000/-	Physical Possession	03.02.2025 10:30 AM to 4:00 PM

Iba kiojen ayoktsü telatetbatem osang tejanga metettsü atema website link <https://www.bankofbaroda.in/e-auction> nung aser online auction portal <https://baanknet.com> nung repringang. Iba dak alia 'bid' asütsü jangrartermi Authorised Officer den **Mobile: 96782 11267** ajanga tongtepreteptsü akok.

Date: **04.01.2025**
Place: Kohima

Authorised Officer
Bank of Baroda

Government of India
Ministry of Chemicals & Fertilizers
Department of Pharmaceuticals

pmbi
Pharmaceuticals & Medical Devices Bureau of India

जन औषधि
जन औषधि परियोजना

JAN AUSHADHI

Branded mozütem den medemdangra shilem **50% nungi**
80% tashi ajemer jenjang dalang agi mozü tajung aika angutsü

14500+
Jan Aushadhi Kendra

2000+
High Quality Medicines

300+
Surgical Equipments

Pei Sasa Mapa Inyaktettsü Atema Maongka Tajung

Under the **Pradhan Mantri Bhartiya Janaushadhi Pariyojana**

Nü meyong **Jan Aushadi Kendra** lapokang

Ita shia incentive sen 20,000/- tashi Jan Aushadi Kendra kiburtem nem agutsütsü

Scan QR Code

Scan QR Code to know How to Open Jan Aushadhi Kendra

For more information download "Jan Aushadhi Sugam" mobile app

www.janaushadhi.gov.in

National Toll Free Helpline **1800 180 8080**

FORM NO. 14
[See Regulation 33(2)]

OFFICE OF THE RECOVERY OFFICER- I/II
DEBTS RECOVERY TRIBUNAL, GUWAHATI
Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati- 781007 (Assam)

DEMAND NOTICE AGÜTSÜR

Recovery of Debts & Bankruptcy Act, 1993 kübok Sections 25 nungi 28 tashi aser Income Tax Act, 1961 indang Second Schedule nung Rule 2 kübok.

RC/226/2022
BANK OF BARODA
-Versus-
MR. VIHUTO I AOMI AND ANOTHER

To,
(CD 1) **Mr. Vihuto I Aomi and Another**
Son of Late Ikishe Aomi, Care of Naga Construction Pvt. Ltd., SB 32 and 36, Naga Shopping Arcade, Erabil, Old Airport Road, P.S. and P.O. 2 Half Mile Dimapur, Nagaland, Dimapur, Nagaland- 797115.

(CD 2) **Sri Vihuto I Aomi**
Son of Late Ikishe Aomi, SB 32 and 36, Naga Shopping Arcade, Erabil, Old Airport Road, P.S. and P.O. 2 Mile Dimapur, Nagaland.

OA/231/2018 nung DEBTS RECOVERY TRIBUNAL, GUWAHATI nung Presiding Officer-i tetuyuba agütsüba nung ajemdaker Recovery Certificate nung aliba ama sentsüh **Rs. 10,45,360.00 (Rupees Ten Lakhs Forty Five Thousands Three Hundred Sixty Only)** den pendentelette aser sentsüh mouma tashi future interest @ 10.25 % Compound Interest Monthly w.e.f. **01.05.2018** aser costs **Rs. 13,000/- (Rupees Thirteen Thousands Only)** na (Jointly and Severally/ Fully/ Limited) anema lir.

(1) Amount due as per the Recovery Certificate:	Rs. 10,45,360.00
(2) Interest from 01.05.2018 to 15.03.2023 @ 10.25%	Rs. 5,32,483.23
(3) Costs	Rs. 13,000.00
TOTAL	Rs. 15,90,843.23

2. Nü dang iba notice agütsüba sülen anogo 15 tsungda senji agüjang ta tuyur, mesüra Recovery of Debts Due to Banks and Financial Institutions Act, 1993 aser Rules nung ajemdaker inyaktüsü.

3. Taruba ken o mangadandangsa affidavit nung nü kiojen sangdongang ta nü dang tuyur.

4. Nü dang **29.01.2025** anogo nung anepdang 10:30 matongdang tsünglanglen sign süa alir matsüngdangi arung ta tuyur.

5. Temalen shia aliba senotsü den külemi nai item senotsü ya-a agütsütsüsa akütsü:

(a) Iba certificate /execution proceedings indang notice agütsüba mapang nungisa item ama interests.

(b) Iba notice aser warrants agütsüdag teindokba sen ajak aser sentsüh alangzüksü atema inyaksangshidang indokba sen ajak.

Tsünglanglen kü meyongnem den iba Tribunal indang seal, iba anogo nung agütsür: 13.11.2024

RECOVERY OFFICER
DEBTS RECOVERY TRIBUNAL GUWAHATI



TIR YIMYIM YIMOBILEM (EDITORIAL)

DIMAPUR

KÜPTOKNÜ

AENJETI 04, 2025

Taküma kechi inyaktsü ?

A tangji, takokeribo taküm küm-a ali alitsü, ki asütsü aser benjong chiyongteptsü ta bilema sentong atonga alitsüa akok, itemjia sentong tajung aser Tsüngremi moatsüba purtem asütsü. Ajsüaka, taküm küm asenok ajak asoshi tongtibang teinyaktsüjibo ali alia ki asütsübaji masü aser benjongbentsü sentong tapu balala monga jajatsübajia masü saka Naga yimten tebilemtsü ya asenok ajak temulung ka ser tembangtsü merangtsübaji asütsü. Taoba kümtembo, ataloktsü masüyonga, neboritembo temulung lemdakja Christmas tenüng nung Naga yimten tebilemtsü ken o tembanga renemtsü amaisa jembia aru saka yaküm Christmas mapangbo Naga yimten tebilemtsü ken o India den jembia tembangtsü atemabo kecha jembia mangashi aser tang küm tasen tenzükba mapanga nübortem narongi angashitsüسابو kecha jembia mangashir. Ashiko, nübortemi mangashi aser memetetaka, tejembitsü purtembo nüken belem jenti agia Naga yimten tebilemtsü ken o ya kokteta tembangtsü maneni merangya alitsüa akok, ajsüaka Naga yimten tebilemtsü ya yimkong tebilemtsü, anungji yimkong adenshia shisalemsateper tajungba lenmang ka bushia pateta metugutetra, nisung ishikati Naga nunger tenüng nung jembiba agibo tebilemtsü ya tuluba dang kuma aotsü. Aji oda, Naga nunger yimkong tenüng nung pei pei kini temulung lemteta shimteta yutsüba kin hoho shia nung lenirtem adenshia tanü putu nung asenok dak apet Naga yimten jenjang tasen ka latettsü merangtsü atema Naga kin kati lenisüba shilem aser khuret agia ayongdentsüba mapangji taküm küm ya lir ta angateter. Aji oda, Naga nunger asoshi Tsüngremer sentong angatettsüba tasak saka nisungeri bilemtsü agibo taküm küm yasa telemtetba kati marutetra, Naga nunger yimten tia aser loktiliba tensa tamajungba katiang ia adoktsü ana nung lir. Ibaji atema shisabolua bilema asen kini danga Naga nunger ayongdena yimten tebilemtsü ya koktettsüa lenmang bushitettsü atema lenisüba ka agütsütsü nungdaker. Asenok dak Tsüngremia mememtsüa aser nisungia sempatsüa tashimait aika lir, ajsüaka ano tanga Naga nungertemi asenok dak imlar, kechiyong Naga nunger asoshi khuret bena tsüngdong tonga oa meima anepaluba kinjibo asen kin dak alaka tanga kin aikabo mali. Aji oda, jungaka mejungaka, ashiko, Nagaland state akümba yaa asen kini anir telemtetba agiba ajanga tangar kintemi temulung lemteta anidak asütsüa akok. Kasaji, tanga asenokbo taküma aotsüa akok, saka joko Naga nungertema ojang timatemtsüa aser ojang akoksatsüa asenoki Tsüngrem dang sarasadema shisatsü meshir Naga nunger yimten tebilemtsü ya kokteta lenmang tajung kati anitettsübaji asenok khuret aser tebilemtsü asütsüla. Asenoki angatettsüba kaji, Naga yimten tebilemtsü ken o tatembang kuma melatettet tashi Nagaland nung petsaperong manentsü aser idangji tangar dang nungi tali asen kin aser asen nübortem tim atemtsü. Ashiko, Naga yimten tebilemtsü ken o tatembang kuma latetba terenemba nungji asenok kecha balaka tajangzük aser maongka mangutsüa akok, kechiyong linük tenzükertem tebilemtsü khuret abenba nung tongti shilem agir lenirtem rongnung asen kin nungibo mali. Ajsüaka, Naga yimten tebilemtsü ken o latettsüba mapa nung ya, ni kechi angur aser ajangzük (?) ta masü saka nia Naga nunger nem yimten nung anisüngzük agütsüteter asü magütsüteter ta asübajiang asenok asoshibo tongtibang teinyaktsü asütsüla. Aji oda, Naga yimten nüchiso bushir telok paika nung ya telok ka nung danga asen nisung tokolak ser ali asübo asenok jembia mesademla saka asenokbo telok ajak nung tanidaker ta asünungji, asenoki Naga nunger ajungtsü atema aseni bilemba jembitsübaji sademsadema lir ta bilemer. Ibaji shisadanga, asenoki tang ya asenok asoshibo Naga nunger atema mapa tajung inyaktsü mapang tajungtiba ta bilema küm tasen tenzükba aoba den külemi lenisüba sentong tasen ka agütsütsü junger. Aji oda, Naga nunger tebilemtsü ya asen tebilemtsü kümer aseni anir Naga nungertem den shisalemsateptsübaji asenok asoshibo tsüa akaba mapa ka ama bilema inyaktsüla.

OLEMSABANG

Kibong nung Amendakba Arogo ka Yangludi (Towards a Family-based Church)

Tiatoshi Longkumer, Kohima

Okila: Küm ana-asek ka tejaklen Covid-19 tashidak agi alima ajonga atongdang meimchir koda kangshitepogo, asenok ajaki bilemtetya alitsü. Office, school, tekülem tenla ki, lokti senden ajak anen aser nisung ajak kibok nung dang alitsü ozüng liasü. Manem-majaka mozü ki dangi aotsü kanga tsübutep kechiyong yangji Covid agi tonger shirangertem liasü. Pastortem asoshia covid tashidak agi asürtem atema funeral agitsü kanga tasak mapang ajuru, aser mask agi tebang-teni nembanger sübotsü balaka semer dang agitsü mela. Anogo shia aangertem mapa makai kumadok; mapa nung alirtem hopta nung khen-anaben dang ao; school class ajak online nung agi, aser tekülem sentep youtube aser kibok ministry aküm.

Covid-19 lockdown mapang tatalokba tulutibakaji kibong rangben anogo aika kidang külemi kazütepajia liasü. Aika asoshi iba ya mapang tajungji liasü. Ano kar atemabo talaktsü aser meinprongtsü tulu liasü. Aji saka tamakok dang nungi tajangzükjisa tuluba liasü. Ki ka nung külemi liaka longjemer sensaksema mekazüdangba kibongtem tali metetepa aküm. Kibong tekülem magidangi aruba kibongtem, wara tsübuba ajanga Tsüngrem dang longjemer teyari meshia sarasadem tenzük. Tebu mesüra tetsü ka lokti mapai moi kidang -kilong nung kazüra taktsüka ama bilemba tu, joko lokti tentet ajak anenadok nung taolen makai kibok nung ali. Aser iba ya ajanga kibongji lokti ajak tamendakdak ta ashiba tu atangjia ta angateta aru.

Arogo Tongti- tongshiji Kibong:

Atangji, kibong junga achaayang mesüi lokti aser arogo anitsü merangbaji laishiba tesayuba anema lir. 1 Timoti 3: 4 & 5 nung, "Arogo tanükerji ... pei kibong jung-junga yimsü sütetba, aser lenmang ajak nung pei chirtem retreta azüoka yutetba nisung asütsüla. Kechiaser nisung kati pei kibong yimsüsütsü memetetra, pai koda Tsüngrem arogo acha-yangtsü?" Iba lai yagi sayur, arogo nung tanüker aser tenzük shimdang tongtipangtiba khuliji (criterion) pei kibong junga yimsüsütetba asütsüla. Aji oda, arogo nung tenzük ajaki iba Tsüngremer ozüng ya mamatoktsüla.

Arogo ka taküm lidangtsüba tongshiji laishiba sürbo kibok/kibongji lir. Tenlakidang arogoji amendaka mali. Yabo tekülem sentep atema lokti ajurutepdak tesem dang. Arogo ka taküm lidaktsübaji kibok/kibongtemji lir. Koba arogoi kibok nung tera junga yanga lidir, iba arogojibo kodanga melaotsü. Saka koba arogoi pa takümji tenlakidang dang amenloker iba arogojibo melamela laotsü, kechiyong pa tongti long (corner stone) mali. Laishiba nung reprangdangra, tekülemji yimjak nung masü saka kibok nung tenzük ta T. Mapa kaket aser tasen laitem nung angor (1 Kor. 16: 19; Kol. 4; 15; Rom 16: 5; T. Mapa 12: 12; Mathi 18: 20). Kibongji tekülem tamendakdak lir, aser iba nungi Tsüngrem külembaji Pai kotak nungi angashir. Kaisaria nung Itali nungi aruba temeranger telok noklang ka madak tanishir Kornelia aser par kinunger ajonga yimsü nung keta asenba aser Tsüngrem dang teti sarasadema liasü ta T. Mapa 10:1 - 2 nung shia angutsü. Aser kenü kotak tenyari kati Kornelia dang ashi, "Ne sarasadem aser nai angati agütsüba indang Tsüngrem madangi mamatsüa atuogo" (tk. 4). Iba sülen tanela temeshi Korneliar kidangi tenyar Peter anir arua osangtajung shidaktsüba asenoki angor. Aji oda, kibok tekülem aser sarasademji Tsüngremi asenok nungi akhanger, aser pai iba inyakba nung pelar.

Kibongji tanela yangerdak aser nütsüngsüba kimong lir.

Kibong nung tanela ainba mapa aser nütsüngsüba inyakbaji tenlakidang jatener sendong aika agiba dang nungi tajungba jenjang nung angor. Ni yangi shinübaji, arogo sentong ajak joko kiboki dang bener iang ta ashirba masü. Atangji, arogo ka tanela nung aintsü aser taküm alitsü asoshi tekülem sentep aser tongtipang sentongjibosa alitsü. Saka tarutsü nungbo arogo sendongtemi nübortem talila belemdangtsüba nungi anisüngzük agütsütsü bilemtsüla. Jiloshi aiba sendongtem, tajangzük onsara maliba inyaksangshitem, aser talila lokti sentep ayongba ajak ya khen benteta merüktettsü nungdaka lir. Arogo tenzükertemi kibok tekülem aser kibong rangben tanelaren renlokba nung tali temulung agütsütsü nungdaksü. Tanü putu nung longpok tarokji kibok ya kümogo. Arogo züngsembo sür nung nütsüng nübortem joko kibok nungi matoker jenti kümogo. Arogo nung ango aputsübaji kima-yimdong nung masü saka kibok nung aputsü teimba lir.

Kibok aser kibong ministry indang jembidang asenoki pastoral home visit aser sayutsüngi aser sarasadem committee membertem telong junger kibok sema oa Tsüngrem o shia sarasademtsüba dak alaka tanga inyakyim aikabo mebilemteter. Saka tarutsü nungbo, kiboksemerji ang kibok nungji temoatsü ngur adoktsüa kibongtem yanglutettsüla. Pastoral home visit dak alaka arogoi kibok/kibong ajak dena inyakba ministry-tem sarasadema shisadangtsüla. "Tenlakidang arung" ta ajaba sentongtem kisüng masü, saka tenlakiji kibok-i aitsüla, kechiaser arogo tamendakdakji kibokji lir. Kodang tanela asüngsashi ya kibong nung tenzükdir iba jagibo arogo nung kechai-a merosepdaktsüba revival adoktsü. Aji oda, tanü asen lima nung "arog revival" dang nungi "Home revival" tenungdakba kümogo.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Colombia nung pastor ka den par kibong züngsemtem khaset



Pastor, Marlon Lora'er kibong noksa nung angur.

January 03, 2025: Amongnü (December 29, 2024) aonung Columbia nung Evangelical pastor ka aser par kibong züngsemtem tekülem sentong tembangba sülen restaurant ka kima chiyunga aliba mapang nung nisung ka motorcycle nung aruba sülen parnok dak injang khaloktsü. Mejangjaba nisung jagi Prince of Peace Villaparaguay Church nung Pastor Marlon Lora, pa kinüngtsü Yorley Rincon aser par jala Angela Lora Rincón (24) nunger khaset. Par jabaso arrshi küm 21, Santiago Lora Rincón bo teyiru dang yirua liasü.

Christian Solidarity Worldwide (CSW)-i ashiba agi, pastor Lora aser par Arogo ya Missionaries Biblical Churches (IBM) denomination nungi lir aser pai linük tesem balala nung Arogo 30 shi acha-ayanga liasü.

Pastor Lora den külemi inyaksemer, Pastor Giovanni Bermúdez-i, "Pastor Marlon Lora-i tangar pastor ka taküm amokmeren tia nung aliba

tebilemsü lemsatepa liasü," ta ashi.

"Onok pastor tem aikati inyakba ama pastor Marlon-ia telung nung khuert jenti liaka temai madokdaksür," ta Bermúdez-i ashi.

Association of Pastors of Aguachica nung Tir, Pastor Divanit Alfonso Calle-i, Aguachica nung Khristantemi Lora aser pa kibong kanga meima liasü, ta ashi.

Pastor Lora'er jabaso Santiago ya systems engineering tezüngdak aser jala, Ángela public utilities firm ka nung journalist inyaka liasü.

Pastor kibong khasetsangji tang tashi nungbo mapu. Colombia sorkarisa pastor kibong khasetsang indang osang tejangja agütsür nem senpet Peso sen million 50 agütsütsü ta sangdongogo.

Pastor kibong khasetba aonungjisa Aguachica Mayor, Greisy Roqueme-i curfew ozüng sangdonga liasü.

Mayor-i, "Azü tokshiba mapatem nem asen teimla mauyadaksütsü, anungji ni

National sorkar, Minister of Defense & Public Force dang Aguachica municipality nung rangloksü mepishir," ta metetdaksü.

Yaküm October ita nung Colombia Ombudsman Office ajanga ashiba agi, 2023 küm nungi 2024 küm tsüngda tamangba yimsü temeden anema inyakba shilem 31 agi teimba kümogo. Linük nung Arogotem aser denominations balala anema inyakba aser yimsü lenirtem aser sorkar ketdangsertem taküm amokmerenba kanga bulua kümogo.

2024 küm Colombia nung Valle Del Cauca Arogo nung züngsem ana Ever aser Gerson Garcia Velez na tepset aser pastor ki ka rongdoktsüba densema Khristantem anema inyakba tatalokba aika liasü.

Alima nung Khristantem tamajungba reshikangshiba linük 50 rongnung Colombia ya jenjang 34buba nung lir (Open Doors International 2024 World Watch List).

Arunachal nung asentenshir anti-conversion ozüng benoktsü

January 03, 2025: Tawa Christmas benjung mongli December 27 nü Arunachal Pradesh Chief Minister, Pema Khandu-i, state sorkari mapang talangka mapa kuma mebenokba Freedom of Religion Act ozüng benoktsü, ta sangdongogo.

Iba ozüng ya 1978 küm agizüka liasü saka mapa kuma mebenok. State yimtiba, Itanagar nung Indigenous Faith and Cultural Society of Arunachal Pradesh (IFCSAP) Silver Jubilee amongdang Chief Minister-i iba osang ya metetdakja liasü.

Freedom of Religion Act ya 1978 küm agizüka liasü. Tashiyim, mesüzükba mesüra külakküpong ajanga yimsü meyipdaksüba nokdangtsü nükjidong nung iba ozüng agizüka liasü. Iba ozüng kübok

aibelenertem küm 2 tashi tepuokdak ayutsü aser senchi 10,000 tashi achitsü akok.

Yaküm September ita nung Guwahati High Court-i state sorkar dang, taruba ita 6 tsüngda Freedom of Religion Act temzüngtem renemang, ta tuyua liasü.

Taoba mapang IFCSAP general secretary, Tambo Tamin-i, tesüiba küm 40 dak tali sorkari iba Act nung nungdakba ozüngtem meyanglur, ta shia Guwahati High Court nem temepishiba ken o ka agütsüba sülen court-i sorkar dang iba Act atema ozüng yanglutsü tuyu.

2018 küm Arunachal Pradesh Catholic Association-i ayongzükba sentong ka nung jembidang Chief Minister, Khandu-i Freedom of Religion Act ya ajanga secularism

raksatsütsü akok aser iba ya Khristantem anema benokba ama reprangteter, anungji iba Act agentsüa akok, ta jembia liasü, ajisüaka tawa pai iba Act mapa kuma benoktsü sangdonger.

Tawa IFCSAP sentong nungji Union Minister of Tribal Affairs, Jial Oram-a densema liasü.

Khandu-i, iba Act ajanga sobaliba wazüka ayuba nung shilem agitsü, ta jembia liasü.

Iba Act ya tesüiba mapang Chief Minister PK Thungon-i aniba sorkari mezüngbuba Legislative Assembly senden nung agizüka liasü.

Silver Jubilee sentong nungji jembidang Khandu-i, 1978 küm Thungon leniba nung sorkari iba ozüng agizükba atema pa nem tenüngsang agüja liasü.

ANOGO ABEN TSÜNGREM DEN

Tsüngrem yimlaba Mathi 5:17-20

Ni samatsütsü masü atalokdaksütsü aru.

Mathi 5:17

Yisu yimsüji tatem maka anung nung chiyongtsü auso dang nungi tali meimchiri ajangshiba tonga aoba lir. Atangji teti tatem maka tekümtetji pa taküm ajungmesodaksüba tiyongtsüji lir. Aji saka, ken atema kümzükbaji Pai aria bilemetsüba nung shilem ka lir. Aji asü nung Pa tesayuba nung tanelaren merükteta taküm yimya Tsüngrem yimli sensopur shia nung imlaba kuli teperi dena lir.

Yisui meimchir libaliro nung akanga soitba Temeshiba dang nung temeshiba ka asoshi aja. Tsüngrem den tesendaktep tashi itta alitsü asoshi iba tasen takangbaji nungdak ta Pai metetta liasü. Tsüngrem den tesendaktep tashi itta ali nung chichiba nütsüng kaji Khristan ka nungi yimlaba mapa tajungji inyaktetsü ain agi sünga alitsü.

Item ya shisadangang: Tsüngremi na nungi kechi yimlar ta nai bilemer? Nai na nungi kechi yimlar iba den medemdangang. Idakji tepela lir asü? Tsüngremi yimlaba ama nai malir ta nai angatetter asü? Ibaji atema nai kechi inyaksü?

Kibubai na tamajung ajak nungi kümzüktsü, Pai ne taküm anüktsü.

Malaysia Youth & Sports Minister Hannah Yeoh nem tai tongloksür



January 03, 2025: Malaysia nung Youth & Sports Minister, Hannah Yeoh-i Muslim nungertem Khristan yimsü dangi meyipdaksütsü meranger aser Malaysia ya Khristan linük ka kümdaksütsü meranger, ta la nem tai tongloksüo, ta International Christian Concern (ICC)-i metetdaksü.

Tawa Dang Wangi police headquarters nung la anema ken o tenet benokogo. Home Ministry indang melungtet telok aikati lai züluba kaket "Becoming Hannah: A Personal Journey" nokdangtsüla, kechiyong iba ya ajanga linük security raksaksatsü, ta ashir.

Yaküm July ita nunga, Yeoh-i Khristan yimsü prokba nung shilem agir, ta la nem tai tongloksü liasü.

Dang Wangi Police Chief, Sulizmie Affendy Sulaiman-i, la anema ken o benoka aliba osangji tejangja aser la anema bushisüngdangdar, ta metetdaksü.

Minister Yeoh-ibo, "Social media nung ni anema video aser osang balala prokba atema ni police nem ken o agütsütsü tebilemba lir. Ni Muslim nungertem Khristan yimsü dangi

meyipdaksütsü meranger aser Malaysia ya Khristan linük kümdaksütsü atema inyaker, ta asüba osangtemji tiyazü," ta metetdaksü.

Tamalen lai taoba mapang Inspector General of Police Musa Hassan-i la tenüng menüksüba atema pa anema ken o ka benoka liasü saka tan hopta High Court-i ken oji thinentüsügo.

2020 küm Universiti Teknologi Mara forum nung jembidang Musa-i, Yeoh-i Islam yimsü ilatsütsü aser Khristan yimsü ajungkettsütsü atema iba kaket zülu, ta aija liasü.

High Court-i lai benokba ken o thinentüsüba sülen lai maneni appellate court matsüngdang kasa ken o benoka lir.

Malaysia nung nütsüng shilem 9 dang Khristantem lir aser nütsüng shilem 60 dak tali Muslim nungertem lir.

Malaysia tesem aika nung anogo shia Khristantemi timtem ajurur. Malaysia nung Khristan yimsü ya ozüng alema masü saka Malay nunger Khristan yimsü dangi meyiptsü ozüng ajanga memelar aser Malay nungertem den Khrista osangtajung lemsateptsü sorkaria memelar.

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Taya

(v) Chiyongtsü kar achidang tebang temeli arongba mesüra yayaba (burning sensation in mouth while eating certain leafy greens)

* Momong taya achidangbo temeli kanga aronger.

Taya

(v) mopong agi mo aser ai laodaktsüba (falling of paddy stalks and weed by wind)

* Tsük arotsü mapang mo ayaba agi aluyimer kanga akoksar.

OLONG PAITEP # 7023

		1				2			3
4									
				5					
6			7				8		9
				10					
	11								
12									13
						14			
15									

TIPIEN :

- 2. Meyoktep - 5
- 4. Teyira - 5
- 5. Aor tebur dang ajaba - 6
- 6. Timba angutsü merang - 6
- 10. Tebilemtsü - 6
- 12. Aochia bilemba - 6
- 14. Anenzüka anisüngzükdak - 5
- 15. _____ r - 5

LANGTSÜNGLEN :

- 1. Nünü'er jala - 3
- 3. Endok-enra - 4
- 4. Tongti medemer - 6
- 5. Tekong nung azükba - 7
- 7. ___ an - 3
- 8. Oset abenba - 3
- 9. Ammang tesangwa - 6
- 11. Te_____m - 4
- 13. Mesük - 3

OLONG PAITEP # 7022 TELANGZÜBA

TIPIEN :

- 1. Telok, 4. Aluru, 6. Ozüing, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü,
- 5. Lenti, 7. Tajangzük, 11. teronem,
- 12. Sempa, 13. Jahaz.

NAI-A YA METETTER MA



Abu Dhabi-i New Year's Eve benjung tulu ka ayongzuka amongba ajanga alima süngmandaktsüogo. Al Wathba nung Sheikh Zayed Festival amongdang "largest fireworks display" sayua liasü aser minute 50 sentong ajanga Guinness World Records 6 tashi yangluteta liasü. Abu Dhabi nung fireworks display dak alia minute 20 tashi 6,000-drone show ka sayua liasü.

Mizoram Governor Hari Babu Kambhampati den tepila sentong agi



Aizawl, January 3, 2025

(Agencies): Brihostibarnü Mizoram Governor Hari Babu Kambhampati den Lengpui airport nung send-off ceremony ka agiogo.

Kambhampati-i Odisha nung Governor inyaktsü atema yashi Mizoram toktsür ogo. Pai küm asem ser ita pungu tashi Mizoram Governor inyaka liasü.

"Kambhampati-i Mizoram nung Governor inyakdang mulungsoa tenzükba aser aria

bilema lemsatepba atema pelar" ta Chief Minister Lalduhoma-ashi.

Pai Governor inyakdang state nung terenlok nguogo aser külemi tejakleni anir aruogo ta CM Lalduhoma-isa ashi.

Dr Hari Babu Kambhampati den ceremonial send-off function nung assembly speaker Lalbiakzama, home minister K. Sapdanga, PWD minister Vanlalhlana, chief secretary Khilli Ram

Meena, DGP Anil Shukla aser tongti ketdangsürtem aden.

Dr Hari Kambhampati-i July 21, 2021 nü Mizoram nung 22 buba Governor inyaktsü tezüngzüktep agia liasü.

Odisha Governor Raghubar Das-i mapa nungi sodi agiba melena pa shim.

Kambhampati melena taoba army chief General (Dr.) Vijay Kumar Singh-i January 9 nü Mizoram governor inyaktsü tezüngzüktep agitsü.

Telungpurtem senzusenbongba atema Tripura-Mizoram arrtsü akangshir

Aizawl, January 3, 2025

(Agencies): Bangladesh nung telungpurtem senzusenbongba osangtem angashiba sülen Border Security Force (BSF) dena sepaitemi Tripura aser Mizoram arrtsütem anükba akangshiogo.

Tripura-i Bangladesh den kilometer 856 aser Mizoram-i kilometer 318 agi arrtsütepa lir. Tripura arrtsülen kilometre 26.64 tashi atsü matsüdang lir aser Mizoram arrtsübo khenyongi matsüdang lir.

Tripura - Mizoram - Bangladesh arrtsülen telungpurtem kanga

senzusenbongba osang ajanga security akangshiogo ta police ketdangsür kati ashi.

Inspector General of Police (Intelligence), Krishnendu Chakraborty-i tawa tu Unakoti aser North Tripura district tem semdangogo aser sepaitem den ajurutep tensa asadangogo.

Yaküm July ita Bangladesh nung mepetmesü tenzükba aser August 5 nü Awami League sorkar atsüngdokba mapang nungi BSF aser state police-i India-Bangladesh arrtsü anükba akangshia liasü.

September 2023 nung Bangladesh nungi telungpur

aika Tripura sorkar tsüngdang temai adok saka Bangladesh nung ano northeast India telungpur kar lir ama bilemer.

September 24, 2024 nü National Liberation Front of Tripura (NLFT) aser All Tripura Tiger Force (ATTF) nungi telungpur 584 tashi Tripura Chief Minister Manik Saha tsüngdang temai adoka liasü.

Union Home Minister Amit Shah dena Delhi nung September 4, 2024 nü yimjung tenangzüktep ka nung sign sütepba sülen telungpurtem temai adok.

Manipur nunger 2 ket nung Rs 1.34 crore alang hon apu

Guwahati, January 3, 2025

(Agencies): New Delhi nung aliba Indira Gandhi International (IGI) Airport nung Customs ketdangsürtemi Manipur nunger lanur ana ket nungi hon bena aliba puogo.

Tena ket nung bena aliba hon indang jenjangji Rs 1.34 crore

shi alang lir.

Manipur nunger lanur ana ya Jeddah, Saudi Arabia nungi IGI airport nung arua anenzük. Idangji Customs ketdangsürtemi tena dak temulung malemba agi sota ayu.

Ketdangsürtemi mita

reprangdang lanur ana temang nung hon seret 1.8 shi miima bena aliba angu.

Tenati hon ji chemical paste ama melener abenba ajanga security checks nung meputet.

Tena customs department ket nung yua lir aser maneni bushisüngdang südar.



Meghalaya police-i Assam nungi nisung asem ket nung sen lakh aika jenjang heroin bena aliba apuba sülen agiba noksa angur. 15th Mile, GS Road, Byrnihat nung drug enforcement operation inyakdang Ekramul Hussain (30), Monjuwara Begum (32), aser Nihar Begum (30) nunger ket nung heroin gram 254.16 den Rs. 58,380 aser mobile phone 4 bena aliba apu.

Menungra Bilemteter



24/11/1984

04/01/2024

Asur Takatemsu Walling

Pungmang Ka ama dang bilemer, saka asangsang nung nai onok toksür orr tanü küm ka abensar, saka onok mulungjang nung na titi alir. Tanu na onok den akümüli nung meliaka onoki iba anogo na menungraseta sarasadema amonger.

~ Temeim Kinungtsü jala aser ojala.

Menungra Bilemteter Sür küm ka ajunger



Lt. Sentisongla

Taoba 2024 küm January 04 nü na onok nungi pilar tanü küm ka ajunger. Ajisüaka, asenok külemi aliba anogotem aser nü temeim onok mulungjang nung taküm lir. Na mali onok kanga rongjener aser nü temeim mapatem menungra bilemteter.

Oja, na onok mulungjang nung teti alitsü aser nü temeim teti bilemtettsü.

- Temeim Kinungbo, Chirnur aser Kinungertem.

SÜR KÜM KA ABENSAR

Menungra bilemteter

Onoki kanga meima aliba

Asür. Wb. Tiakaba Longkumer (Longsa)

s/o Wb. N. Wati Longkumer



Asür. Wb. Tiakaba Longkumer

Asor: 08/02/1978 Asü: 01/01/2024

Tenük agi mangur saka temulong nung teti lir. Nu temeim, yimlibilem aser nai inyakbatem agi onok anogoshi ajungshir.

Teti menungratsü, teti meimtsü

Temeim Oba, Oja, Kinungtsü, Jabaso ana, adianutem aser kinungertem.

Supply Colony

LAND FOR SALE DUNCAN BASTI, DMP

Nuton Bosti

Main road Duncan basti

Nalla

14, 907 sq.ft.

14, 967 sq.ft.

Price : Rs. 1100/- per sq ft. (Negotiable)
Contact : 6009905256

AFFIDAVIT SELF DECLARATION

Pangtisungla wife of JC 551136P Sub Lanuakum HQ/Coy, 17 Assam Regiiment, Pathankot - 91041\7, Punjab, C/o 56 APO, permanant resident of F.A.C Campus Vill. Chuchuyimpang Po. Mokokchung Dist. Mokokcbung 798601 Nagaland. That law producing this affidavit for the purpose of evidence for my wife/spouse correct name (Aadhar card and Pancard)

Old Name : Pangit Sunglaims
Correct Name : PANGITSUNGLA

ALI AYOKER

FOOTHILL LEMANG ANASA VIHOKHU NUNG ALILEPSA-AAYOKER. TALITSÜ KIMONG ATEMA TAJUNG ANUNGJI TALINUR TEMI IBA NUMBER NUNG CONTACT SÜANG. SQFT. NUNG 80/- DIRECT CONTACT : 6009530632 / 6009094225

Venezuela presidential candidate aputsü atema senpet nangzuka lir

Caracas, Aenjeti/January 03 (Agencies): Venezuela sorkari opposition telok nungi linük nungi jena oa alisang presidential candidate Edmundo Gonzalez aputsü asoshi osang agütsür nem senpet sen \$100,000 (£81,000) agütsütsü nangzuka lir.

Gonzalez-i sorkar anema tasa tamajung yanglu aser documents meshidak amshi ta tai tonglokja aputsü totuyuba agütsüba sülen pa linük yutsür September ita jena oa Spain nung jenoka lir.

Taruba Hokulbarnü Tir Nicolas Maduro inauguration masüdag Venezuela-i meyipa shilangtsü Gonzalez-i nangzuka lir aser sorkari vote nung ashikülak mapa inyaka ta aitsür.

Iba sempet sangdonger mapang tatsüka tsünga Gonzalez-i pa Latin America linüktem semdang tenzüksü atema Argentina-i aor ta ashi,

kong pai Honibarnü Maduro anemer tesashi, Tir Milei den ajuruteptsü.

United Nations indang Human Rights Committee ajanga Venezuela dang July 2024 nung tir election agiba voting tallies mesamadaktsüi yua alitsü totuyuba agüja lir.

Iba voting tallies nungya polling station shia nungi vote lemsar anguba indang tejangja lir aser election nung shibai akok ta asüba ken o nung ibai tiyong sür jembir.

Sorkar den sendaktepa aliba National Electoral Council (CNE) ajanga tang tir teinyakdak Maduro-i takok nguogo ta sangdong saka parnoki sangdongba nung kuli ka ama voting tallies magütsütet.

Accredited election witnesses teyari nung opposition ajanga voting tallies shilem 80 dak tema bendena adoktsüba nung par candidate Gonzalez ya

takoker tejangja ta shia liasü.

March ita Venezuela nung tir election indang candidate ka ama Gonzalez tenüng zülüokdang pa aikati junga mejangjai liasü.

Taoba mapang pa kodanga nübur tenzükba mapa inyaka mali aser opposition temia pa junga memeteti liasü.

Saka pai tir menden asoshi tokteptsü sangdonger ita ishika lir opinion polls nung Maduro dang pa jenjang tajungba akum.

Venezuela nung sorkar aser opposition bhukumer tsünga telemsa adoker küm aika arur.

Gonzalez-i nübuyimba mapang telok ana tsünga tangatetep kati arutsü indang jembir, saka Maduro-ibo Gonzalez-i takok ngura azüdokshi alitsü ta tekumdangtsü shia liasü.

2018 küm Maduro tanaben shimba election ya shidak magi ta aikati jembir.

Israel-i Gaza amakdang Hamas police tanishir densema 40 tepset

Gaza City, Aenjeti/January 03 (Agencies): Israel-i tayimtsü amshia Gaza Strip nung tesem 15 amakdang Palestine nung 40 dak tema tepsetogo, ta iba territory nung Hamas meyong Civil Defence service ajanga ashi.

Southern al-Mawasi "humanitarian zone" nung tesem balala jungi jenoka aliba süki nung yasung amakdang nisung 11 tepsetba rongnung Gaza police force tekolakba aser pa indang deputy dena lir, ta ashi.

Hamas meyong interior ministry ajanga Mahmoud Salah aser Hussam Shahwan tepsetba aitsü aser parnok ya humanitarian aser national duty inyaka liasü ta ashir.

Israel indang mitkari Shahwan dak tenük yoker amak ta jangjatsüogo, shiba kiralongrar ka liasü aser pa teyari nung Hamas indang military wong ajanga Israel sepaitem dak amak ta ashir.

Israel-i Brehostibar nikonddang iba anasa bomb pokloktsüba nung nisung trok asü ta ashir aser ano central aser southern Gaza nunga kanga sashia amak.

Israel mitkar-isa souther Gaza nungi khaloktsüba rocket ka anünglak nung lia raksatsü

ta ashir.

Israel-i territory nung mepetmesü tali prokshija aser meimchir timtem tali kumdakja Salah aser Shahwan tepset, ta Gaza interior ministry-i aitsür. Police force ya "civilian protection agency" ka liasü aser parnoki Palestine nung tenzükter ta parnoki ashir.

Hamas yimsüsüba nung parnok shilem lir ta shia Israel-i taoba küm nungi police officers dak tenük yokba sülen Gaza nung tzüzüng ozüng maliba akumer.

Israel Defense Forces (IDF) ajanga ashiba agi, police force yagi Gaza nübur tashiyim agi asüngdangya süa meimchir temeden nung aibelener aser parnok anema nokdaker ajemreptsür.

"Gaza Strip nung IDF amakba nung Hamas indang military wing den teka amteper itdangiter mapa inyakba nung Hassam Shahwan mapa lir," ta parnoki ashi saka Salah tenüng mamshi.

Al-Mawasi nung mamakdang civilian tem lendongi maitsü mechi mera aika agir liasü, ta Israel mitkari ashir.

Hamas den ita 14 raraba ajanga pei kidang nungi prokshia aliba Palestine nung meyirijang aika atema al-

Mawasi nung aliba tzükumlen ya "humanitarian zone" asütsü ta IDF-i sangdonga lir.

Ajisüaka Hamas züngsemtem civilian tem rongnung atsükshia lir ta tai tonglokja iba tesem aiben amaker.

Kasa mapang Israel-i tayimtsü amshia Khan Yunis nung Gaza interior ministry indang headquarters amakdang nisung trok tepset ta medics ajanga ashi. Khan Yunis municipality building telung nung Hamas kiralongrar indang control-and-command centre ka alidak amak, ta IDF-i ashir.

Ano Brehostibarnüsa north tsütsü Jabalia jila aser Gaza City south tsütsü nisung 10 tepset, ta Civil Defence ajanga ashir.

Gaza City anüolen, anasa Shati refugee camp aser ano Deir al-Balah aser urban Maghazi refugee camp nung amakba osanga lir.

2023 küm October 7 nü Israel south tsütsü Hamas-i amakdang nisung 1,200 shi tepseter ano nisung 251 pua bener aoba mechi Israel-i iba telok samatsütsü mechi rara tenzük.

Iba sülen Gaza nung nisung 45,580 dak tema tepsetogo, ta Hamas meyong health ministry ajanga ashir.

South Korean ketdangsüri Yoon aputsü merangba anena lir

Seoul, Anjeti/January 03 (Agencies): South Korean ketdangsür temi tir menden nungi anentsür alisang Yoon Suk-yeol aputsü merang, saka Seoul tiyong nung par ki telung nung par security team den ghonda aika atsütepba sülen iba maparen anena atatsüsa akum.

Presidential Security Service (PSS) ajanga bushisüngdang tem par ki

telungi maitdaktsüi nokdangba sülen mapang tatsüka asoshi martial law sangdongba mechi Yoon aputsü aliba anena atatsü telemtetba agi, ta Corruption Investigation Office for High-ranking Officials (CIO) ajanga Hokulbarnü ashi.

"Mangatetep adoka aliba mechi tanü pa aputsü totuyuba agüja aliba mapa meinyaktet. Iba tesem nung alirtem asoshi bilema iba mapa meinyaki

anena atatsü telemtetba agi," ta CIO ajanga sangdong ka nung ashi.

Yoon-i December 3 nü mapang tatsüka asoshi martial law sangdongba dak sendakba nung sorkar inyakyim anema tashi tali amshi ta tai rtonglokja aliba bushisüngdang nung shilem ka ama bushisüngdang tem Hokulbarneppar ki bushia aru.

(Maneni tapak 8 nung...)

Sports Ministry-i IOA dang Olympic charter sülen anidaksü ashi

New Delhi, Aenjeti/January 03 (Agencies): Sports Ministry ajanga Indian Olympic Association dang Harish Kumar Shetty-i aniba teloki Indian Golf Union elections nung takok anguba magizüksü metetdaksü aser iba amala inyaksangshi yagi paidoktsü akokba 'duplication' aser mangmangtep tali adokdaksür ta ashi.

IOA ajanga Shetty-i aniba IGU ya shidak ta agizük aser Brijinder Singh-i aniba telok ya meshidak ta December 30 nü shiti ka nung shia liasü.

IOA tir PT Usha-i meyongnem agüja aliba shiti nungya National Olympic Committee ajanga Shetty-i aniba telok nem recognition magütsüdang inyakyim kanga junga asadangogo, ta shia liasü.

Ajisüaka ministry ajanga IOA dang Olympic charter sülen anidaksü, ken o reprangshitsü aser governing body inyakyim shidak alitsü atema nungdakba mera agitsü ashi.

Ministry ajanga January 2 nü züluba shiti nung, "IOA tir ajanga 30/12/2024 nü elected body ka nem recognition agütsüba iba Ministry ajanga angazükogo aser iba telemetba agiba kuli kar agüja lir. Indian

Olympic Association Executive Committee aser/mesüra IOA indang tim Affiliation Committee mesüra IOA indang tapet committee ajanga IGU indang constitution aser Sports Code densema amenoka aliba legal provisions junga asadang asü masüar mejangja," ta shia liasü.

"IOA ajanga iba ama mapa inyakba ajanga paidoktsü akokba 'duplication' adoktsü aser mangmangteptsü aser legal scrutiny majangtetsü akok."

IGU office-bearers tasen shimtsü atema December 15 nü AGMs ana amen – ka India Habitat Centre (IHC) nung, kong Singh ya tir ama tanaben shim aser reited Punjab and Haryana High Court judge, Rameshwar Malik ya Returning Officer ama aser danga AGM ya Olympic Bhawan nung amen aser yangji Shetty ya shim aser Justice OP Garg (Retd) ya RO ama shima liasü.

Malik tawabangba kübok agiba election nungya Sports Ministry tenüng nung SPS Tomar dena liasü.

Election agitsü lia Bengal Golf Association-i RO ama Justice Malik shimba memulung, saka Delhi High

Court-i pa tawabangba kübok elections agidaksü aser petitioner nema iba election results sangdongba sülen temzüng-özüng tsütsü nungi ken o benoktsüa temeden agüja liasü.

Ministry ajanga December 28 nü shiti ka agütsüba nung Brijender ya tir ama aser Satish Kumar ya secretary ama IGU election agizüka liasü.

"IGU indang elections agiba ya court of law tongogo aser Hon'ble Delhi High Court-ia totuyuba agütsüogo. Ajidang masü International Golf Federation indang record nunga IGU nung ketdangsür tasen shima aliba inoka lir, koba website nung angutsü," ta ministry ajanga ashi.

"Anungji Indian Olympic Association dang constitution aser Olympic Charter nung shia aliba inyaksangshitsü aser Member National Sports Federations indang tashi aser inyakyim akumtsübotsü ajungshir," ta ashi.

IGU constitution nung aliba ama masü IGU nungi jelia temelaba magie Olympic Bhawan nung IGU telok ka elections agiba angashiogo," ta ministry ajanga ashi.

Auckland Classic: Naomi Osaka semi-final tongogo



Auckland, Aenjeti/January 03 (Agencies): Taoba mapang world number one nung alila Naomi Osaka-i 2022 sülen tang mezüngbuba Auckland Classic nung Hokulbarnü semi-final tongogo.

Pezüben Grand Slam champion bona alila Japan tsür Osaka-i America tsür Hailey Baptiste madak 6-7 (2/7), 6-1, 6-2 agi takok ngua Melbourne nung Australian Open asayatsü lia tasü itshir.

2022 küm April ita Miami Open sülen tang mezüngbuba WTA asayamung nung semi-final asayatsü jenjang ajangtetba sülen lai meranga inyakba nung jangzük angur, ta Osaka-i ashi.

2022 küm Osaka-i July ita jala Shai aso aser tanaben tennis asaya nung shilem agi tenzükur ita 12 jungogo.

"Taoba küm ni kanga meranga inyaker," ta rank 57

nung alila Osaka-i ashi.

"Tanü asaya nung kü sasa kü dak tamang kaa aser temulung alemba nung rangloka liasü."

Arishi küm 27 tain Osaka asoshi Auckland nung mezüng match ana nung jangratema masayatet.

Baptiste den asayadang lai sets ana nung serve tesashi agüja aces toku angu aser iba asayamung nung la asoshi aces 21 liasü.

Set tanabuba nung world number 92 Baptiste ya temesüla yirua anepalua liasü.

Osaka ya Australian Open champion anaben bona lir aser Baptiste yiruba ajanga la tajangzük angu ta ashi.

"La asayar tajung ka lir, la yiruba ya tezüdangtsüka, saka küna asaya tajung asayaogo ta bilemer," ta Auckland nung seeded tenet buba nung alila Osaka-i ashi.

Osaka-i semi-final nung Katie Volynets mesüra Alycia Parks den asayatsü.

BENDANGLI OSANG :

Tapak 7 nungi...

South Korean ketdangsüri Yoon aputsü...

Ajisüaka PSS chief Park Jong-joon-i bushisüngdang danger tem Yoon'er ki telungi maitdaksü aser iba tesem ya military secrets den sendaktepa aliba yong tenokdangba agütsür ta ashi.

CIO aser police dang timba PSS personnel aser sepaitem adenshi, ta CIO ketdangsür kati osangbener dang ashi. CIO aser police tem nokdangtsü mechi nisung 200 shi adenshia 'human chain' yanglu, ta ketdangsüri ashi.

Prosecutors temi Yoon aputsü asüngdangba ama hopta tetenzüklen Seoul nung court kati melaba sülen ketdangsür temi pa kodang aser koma aputsü ta nürburtemi rata liasü.

Iba arrest warrant ya January 6 tashi dang lir aser bushisüngdang temi Yoon ya puer ghonda 48 dang parnok ket nung ayutsü. Iba sülen bushisüngdang temi detention warrant atema asüngdangtsü mesüra chioktsü atema telemetba agitsüla.

Taoba mapanga Yoon indang security temi bushisüngdang tem nokdanga liasü.

Pa pura, South Korean puti otsü nung tir teinyakdak ka apur mezüng akumtsü.

CIO ajanga iba osang mesangdong dang Yoon atema okatsür Yoon Kap-keun-i ashiba agi, bushisüngdang temi pei tashi aser özüng alema inyaker. Yoon'er People Power

Party nung tang tekolak inyaka alisangi pa aputsü thinenba pela agizük aser Yoon mepui bushisüngdang asütsüla ta ashi.

Liberal opposition Democratic Party ajanga Acting President Choi Sang-mok dang presidential security service dang ainshitsü ashi aser mepetmesü nungi kumzüksü pa dak tashi lir ta özüng yanglur Jo Seung-lae-i ashi.

Obendang agüja aliba nung tetsükdaksü agütsüba atema South Korea indang joint investigation unit ajanga presidential security service indang chief aser vice-chief bushisüngdangba mapang lir, ta Yonhap news agency ajanga Hokulbar nikongdang ashi.

Tena ya asüngdangyatsü atema Honibarnü jaoka lir ta osang ajangasa ashi.

New Year mapang Yoon-i par kima pa bhukumer adenshia alirtem dang 'iba linük kumzükua ayutsü asoshi nenok den külemi tatem tashi raratsü' ta shia liasü.

Yoon-i mapang tatsüka atema martial law özüng agütsüba ya özüng agi melaba aser nungdakba mera lir ta tekong meranga nokdaker aser ibai North Korean sepa bhukumer samatsütsü aser election nung ashikülak mapa inyak ta tiazü nung tai tongloktsüba bushisüngdangtsü asoshi lir ta ashir.

Yoon bhukumer meyirijang aika par kima iba bushisüngdang

tembangtsü aser pa tir menden nungi anentsüba meyipa agiang ta tawa takhangba agüja arur.

Yoon bhukumer aser anemer tsüngta azüdokshi madokdaksütsü mechi ketdangsür temi police 2,700 aser police buses 135 par ki anasa yoka lir, ta Yonhap ajanga ashir.

Sorkar anema nokdakba nung aibelenba ngutetra, Yoon ya takum tepiyong tepuokdak ayutsü aser tasüba temerenshi agütsütsü densema temerenshi tesashi aika ajurutsü, aser iba atema tir teinyakdak ka jembulen maka.

Yoon ya yimten nung tetsüng majemokdang South Korea indang prosecutor tekolakba inyaka liasü aser December 14 nü National Assembly nung 204-85 agi pa tir mapa nungi anentsütsüvote agütsüba sülen tir mapa meinyaki anenja lir.

Yoon melensang Han Duck-soo-i Constitutional Court nung tazüng aliba menden asem tekeratiba nung süngdaksütsü memulungba mechi legislature temi anentsü aser finance minister aser deputy prime minister Choi ya action president ama inyaktar.

Constitutional Court yagi Yoon ya anentsütsü aser manentsütsü ta jembir aser ita trok tsüngta obendang agütsütsüla aser obendanger züngsem toku aliba nungi trok-i mulungba nung aotsü.

STATE OSANG :

Tapak 2 nungi...

Linük tesem 12 nung NIELIT...

Iba sentong nung Assam Chief Minister Dr. Hemanta Biswa Sarma-ia ato kilonser indang mangdang lemsatep, kong alima ajungai semiconductor chips nung metaloka alitsü, koba "Made in India" aser "Made in Assam" alitsü, ta ashi.

Iba semiconductor industry ajanga region tejakleni anir aotsü mangdang pai lemsatep aser iba atema nübu nungdaksü, ta ashi.

NIELIT amenoktsü atema Assam sorkari otsü yanglua anogo ka nung dang ali latettsüogo, ta Assam CM-i ashi.

Assam Governor Sri Lakshman Prasad Acharya-ia iba sentong nung jembidang, NIELIT Deemed to be University yagi Artificial Intelligence, Machine Learning, Blockchain Technology, Industry 4.0, Semiconductor Design & Manufacturing, Automotive Electronics, Drone Technology, Cybersecurity & Forensics, Bioinformatics amala nung Undergraduate, Postgraduate aser Ph.D programs tem agütsütsü.

nung higher education agütsütsü, ta ashi.

National Institute of Electronics & Information Technology (NIELIT) ya MeitY kübok Autonomous Scientific Society ka lir aser Ministry of Education ajanga distinct category kübok "Deemed to Be University" jenjang agütsü.

NIELIT indang main campus ya Ropar (Punjab) nung lir aser iba indang constituent units 11 ya Aizawl, Agartala, Aurangabad, Calicut, Gorakhpur, Imphal, Itanagar, Kekri, Kohima, Patna, aser Srinagar nung lir.

Iba University nung Artificial Intelligence, Machine Learning, Blockchain Technology, Industry 4.0, Semiconductor Design & Manufacturing, Automotive Electronics, Drone Technology, Cybersecurity & Forensics, Bioinformatics amala nung Undergraduate, Postgraduate aser Ph.D programs tem agütsütsü.

BILEMDANGANG

"Talenba maliba nisungi teti yimjung shimer."